

ОРОСЫН ХОЛБООНЫ УЛСЫН ТӨРИЙН ӨМЧИЙН ТАЛААРХ ЭРХ ЗҮЙН ЗОХИЦУУЛАЛТ (Лавлагаа мэдээлэл)

Д. Мягмарцэрэн

ОРОСЫН ХОЛБООНЫ УЛСЫН ТӨРИЙН ӨМЧИЙН ТАЛААРХ ЭРХ ЗҮЙН ЗОХИЦУУЛАЛТ

ОХУ-ын Үндсэн хуулиар хэн эзэмшиж байгаагаас үл хамааран өмчийн бүх хэлбэр эрх тэгш байхаар заасан байдаг. Харин төрийн өмчийн тухай ойлголт нь эдийн засгийн харилцаанд онцлог шинж чанартай байдаг. Учир нь Төр эдийн засгийн харилцаанд хоёр талтайгаар оролцдог.

- **Нэгдүгээрт**, төр өөрийн бүрэн эрхийн дагуу эдийн засгийн харилцаанд оролцогчдын эрх үүргийг тодорхойлсон эрх зүйн актуудыг батлан гаргах замаар эдийн засгийн харилцааг зохицуулах байдлаар оролцдог.
- **Хоёрдугаарт**, эдийн засгийн хаилцаанд өөрийн эзэмшил ашиглалд буй материаллаг болон материаллаг бус эд хөрөнгийн үндсэн дээр улс орны нийгэм эдийн засгийн асуудлуудыг шийдвэрлэх үүрэг бүхий оролцогч нь болдог.

Иймээс төрийн өмч нь улсын материаллаг болон материаллаг бус үнэт зүйлсийг агуулсан өмчийн харилцааны нэг хэлбэр нь байдаг. Энэ харилцааны субъект нь үндсэндээ төрийн байгууллагууд байдаг бол объект төрийн өмч хөрөнгө байдаг.

ОХУ-ын төрийн өмчлөлд дараах зүйлүүд багтана.

- Улсын төсвийн болон төсвийн бус нөөцийн баялаг,
- ОХУ-ын Төв банкны баялаг болон өмч хөрөнгө,
- ОХУ-ын алтны нөөц,
- Улсын эрдэнэсийн сан,
- Улсын урлаг соёлын түүхэн өв хөрөнгө, дурсгалт зүйлс,
- Археологи, ашигт малтмалын ховор олдвор,
- Хот байгуулалт, архитектур, хөшөө дурсгалын үнэт зүйлс,
- Улсын хамгаалалтад байгаа байгаль орчны тодорхой бүсүүд,
- Цахилгаан эрчим хүчний системийн эд хөрөнгө,
- Сансрын нислэгийн аппаратууд, хиймэл дагуулууд,
- Цөмийн материалууд
- ОХУ-ын зэвсэгт хүчний эд хөрөнгө,
- ОХУ-ын яамд, төрийн байгууллагуудын эд хөрөнгө,
- Төрийн өмчит үйлдвэрийн газруудын эд хөрөнгө,
- Улсын мэдлийн гүүр, замууд
- Ашигт малтмал
- Усны нөөц
- Далай тэнгисийн олзворууд
- Ой,
- улсын нөөцийн хөдөлгөөнт агуулах, хангамжийн газрууд,
- Тэсрэх бодис, байлдааны болон бусад төрлийн зэвсэг үйлдвэрлэл, цөмийн болон цацраг идэвхит бодисийн үйлдвэр,
- Төрийн байгууллага болон төрийн удирлагын үүрэг бүхий байгууллагуудын

UIN.MN

СУДАЛГААНЫ САН

- харилцаа холбоо, инженерийн дэд бүтэц,
- Үндэсний аюулгүй байдал болон улсын нийгэм эдийн засагт нөлөөлөхүйц стратегийн ач холбогдол бүхий үйлдвэр аж ахуйн газрууд, байгууллагууд багтана.

ОХУ-ын төрийн өмчийн зүйл нь:

- газар
- мөнгөн хөрөнгө: хувьцаа болон бусад үнэт цаас,
- хувьцаат компани дахь төрийн эзэмшлийн хувь хэмжээ,
- Төрийн байгууллагуудын байр,
- Гадаад өр,
- Оюуны өмчийн зүйл, материаллаг бус эд хөрөнгө

Хилийн чанад дахь төрийн өмч хөрөнгө нь ОХУ-ын хуулийн дагуу захиран зарцуулдагдана. Орон нутаг дахь төрийн өмчийг тухайн нутгийн өөрөө удирдах байгууллага захиран зарцуулах эрхтэй.

Төрийн өмчийн хэлбэр, тэдгээрийг захиран зарцуулахтай холбоотой харилцааг ОХУ-ын Үндсэн хууль болон Иргэний хууль, бусад эрх зүйн актаар зохицуулна. Ерөнхийлөгчийн зарлиг, ОХУ-ын парламентын шийдвэр (Төрийн Дум), Засгийн газар болон тухайн өмч хөрөнгийг хариуцах яамны шийдвэрийг үндэслэн төрийн өмчийг захиран зарцуулна. Гэхдээ эдгээр шийдвэрүүдийн дагуу хууль бусаар төрийн өмчийг бусдад шилжүүлэн өгөхийг хориглодог. Хариуцсан яам нь төрийн болон орон нутгийн өмчийн эд хөрөнгийг бусдад шилжүүлэх буюу төрийн өмчлөлөөс гаргах тохиолдолд Засгийн газар болон парламентын шийдвэрийг үндэслэнэ.

Төрийн өмчийг бусдад шилжүүлэхэд хариу төлбөртэй болон хариу төлбөргүй байж болно. Төрийн өмчөөс орон нутгийн өмчид шилжүүлэхэд нийтийн орон сууцны барилга болон холбогдох инженерийн дэд бүтцийг үнэ төлбөргүй шилжүүлнэ. Төрийн өмчийг бусдад шилжүүлэх үйл явц болон гарсан шийдвэр нь ижил тохиолдолд нийтлэг байдлаар үйлчлэх зарчим баримтлана. Бусдад шилжүүлэхийг хориглосон бүртгэлд байгаа төрийн өмчийн шилжүүлэлтийн талаарх шийдвэрийг парламентын шийдвэрийн үндсэн дээр гүйцэтгэх засаглалын тэргүүн гаргана. Тухайн орон нутаг дахь нутгийн өөрөө удирдах байгууллагын мэдэл дэх төрийн өмчийг бусад орон нутаг дахь төрийн байгууллагад шилжүүлэх тохиолдолд нутгийн өөрөө удирдах байгууллагын шийдвэрээр шилжүүлнэ.

Төрийн өмчийн эд хөрөнгийг эзэмшиж ашиглан захиран зарцуулахдаа төрийн ашиг сонирхол болон тогтоосон хууль журмыг зөрчихийг хориглох бөгөөд мөн энэ нь нийтийн ашиг сонирхолд нийцсэн байхыг шаардана. Энэ зарчим улсын бүх нутаг дэвсгэрт ижил мөрдөгдөнө. Төрийн өмчийн удирдлага зохион байгуулалт нь төрийн чиг үүргийг хангахад чиглэгдэнэ.

ОХУ-ын нэрийн өмнөөс төрийн өмчийг захиран зарцуулах эрх мэдэл нь Засгийн газарт хадгалагдах ба үүн дотроо Өмчийн харилцааны яам гол үүрэг гүйцэтгэнэ. Энэхүү Яам нь Холбооны Комисстой хамтран үнэт цаас хөрөнгийн зах зээл дээр улсын хувьцааны багц болон бусад үнэт цаастай холбогдох асуудлыг шийдвэрлэнэ. Улсын хөрөнгийн сантай хамтран төрийн өмчийн хувьцааны багцын худалдаа арилжааг эрхэлнэ. Эдийн засаг, санхүүгийн асуудал хариуцсан Холбооны албатай хамтран төрийн өмчийн үйлдвэр аж ахуйн газар байгуулах, татан буулгах асуудлыг шийдвэрлэнэ.

Иймээс энэхүү Яам нь төрийн өмчийг зохистой ашиглах, эдийн засагт шинэчлэл хийх төрийн бодлогыг хэрэгжүүлэхэд гол үүрэгтэй юм.

Үүний тулд дараахь зүйлүүдийг хийж гүйцэтгэнэ:

- гүйцэтгэх засаглалын бусад байгууллагууд болон орон нутгийн захиргааны байгууллагуудтай хамтран төрийн мэдлийн өмч хөрөнгийг захиран зарцуулах;
- санхүүгийн бүртгэл тооцооны тогтолцоогоор төрийн мэдлийн өмч хөрөнгийн эзэмшилд ашиглалтад хяналт тавих;
- төрийн өмчийн эд хөрөнгийг хувьчлах бусад байдлаар захиран зарцуулахад хууль эрх зүйн арга замаар ОХУ-ын ашиг сонирхлыг илэрхийлж хамгаалах;
- төрийн өмчийг хувьчлах болон буцааж төрийн өмчид авах хөтөлбөр төлөвлөгөөг боловсруулах, тэдгээрийн хэрэгжилтийг хангах буюу хянах, гарсан үр дүнг Засгийн газрын өмнө хариуцах;
- хууль болон бусад эрх зүйн актад нийцүүлэн төрийн өмчийг захиран зарцуулах төсөл боловсруулах;
- улсын төсөв болон үүнтэй холбогдох төрийн өмчийн эд хөрөнгийн захиран зарцуулалтыг хянах, урьдчилсан төлөвийг тодорхойлох;

Орон нутгийн өмчийг захиран зарцуулахдаа нутгийн өөрөө удирдах байгууллагаас бүрэн эрх олгогдсон төлөөллийн байгуулах байгуулах замаар шийдвэрлэнэ. Энэхүү төлөөллийн байгууллагын эрх үүргийг дараахь эрх зүйн үндсэн дээр тодорхойлно. Үүнд:

- ОХУ-ын хуульд зааснаар;
- Засгийн газрын тэргүүний шийдвэрээр;
- Төрийн байгууллага болон нутгийн өөрөө удирдах байгууллага хоорондын гэрээгээр;

Төрийн байгууллага болон нутгийн өөрөө удирдах байгууллага хоорондын гэрээнд дараах зүйлүүдийг багтаана:

- Бүрэн эрх олгосон зорилго, хамрах хүрээ;
- Эрхээ хэрэгжүүлэх арга зам;
- Гэрээний хугацаа;
- Талуудын эрх үүрэг;
- Санхүүгийн эх үүсвэр;
- Гэрээний зөрчилд ноогдуулах хариуцлага;
- Талууд гэрээнээс татгалзах нөхцөлд үүсэх үр дагавар зэргийг тодорхой тусгасан байна.

Ихэвчлэн дараахь шалтгааны улмаас талууд гэрээнээс татгалзах нөхцөл бүрддэг. Үүнд:

- төрийн байгууллагын санаачлагаар гэрээнээс татгалзахад, төрийн өмчийг захиран зарцуулахтай холбоотой үүргийг илүү үр дүнтэй хэрэгжүүлэх байгууллага бий болсон бол;
- нутгийн захиргааны байгууллагын санаачлагаар гэрээнээс татгалзахад, өөрийн бүрэн эрхийн хүрээнд өгөгдсөн үүргийг биелүүлэх боломжгүй бол гэрээнээс татгалзах саналаа өгдөг байна.

Төрийн өмч хөрөнгийн захиран зарцуулалтад дараахь байгууллагууд ерөнхий хяналт тавьдаг. Төрийн Дум, Засгийн газар, Салбарын яам, Аудитын газар, Ерөнхийлөгчийн дэргэдэх Ерөнхий хяналтын газар. Харин нарийвчилсан байдлаар санхүүгийн хяналтыг Улсын хяналт шалгалтын алба болон тусгайлсан эрх үүрэг бүхий төрийн байгууллагууд хэрэгжүүлдэг.

Төрийн Думын эрх үүргийн хүрээнд:

- а) төрийн өмчийг захиран зарцуулсан талаар Засгийн газраас ирүүлсэн тооцоо, мэдээ, баримттай танилцах;
- б) төрийн өмчийг захиран зарцуулах талаар Думын гишүүдээс гаргасан саналыг хүргүүлэх;
- в) улсын төсвийн орлогын эх үүсвэрүүдийг хянах, тэр дундаа төсөвт орлого оруулдаг төрийн өмчийг хувьчлах, худалдах асуудалд онцгой анхаарал тавьдаг.
- ОХУ-ын Засгийн газрын хувьд:
- а) төрийн өмчийн эд хөрөнгийг захиран зарцуулахтай нь холбогдуулан эрх бүхий Яамны тайлан тооцоо, үйл ажиллагааг хянах;
- б) төрийн өмчийн эд хөрөнгийг захиран зарцуулах эрх бүхий Яамны тайлан тооцоог батлах
- в) төрийн өмчийн эд хөрөнгийг захиран зарцуулах талаар хууль зөрчсөн үйлдэлд эрх хэмжээнийхээ хүрээнд арга хэмжээ авах.
- Салбарын Яамны хувьд:
- а) төрийн өмчийн эд хөрөнгийн ашиглалтын талаар хийсэн хяналт шалгалтын мэдээг гаргах;
- б) төрийн өмчийн эд хөрөнгийн ашиглалтын талаарх мэдээ, баримтуудыг бэлтгэх, зохих этгээдийн асуулгад хариу өгөх;
- в) төрийн нэрийн өмнөөс төрийн өмчийн эд хөрөнгийн ашиглалтын талаар хяналт шалгалт хийж, гарсан үр дүнг холбогдох хууль журмын дагуу зүй зохистой байгаа эсэхийг хянана.

Төрийн өмчийн эд хөрөнгийг захиран зарцуулахад дараахь зарчмыг баримтлана.

- Хуулийн дагуу,
- Эзэмшиж ашиглаж буй этгээд нь олгогдсон бүрэн эрхийнхээ хүрээнээс гажихгүй байх;
- Хяналттай, тооцоотой байх,
- Ил тод байх,
- Эзэмшиж ашиглаж буй этгээд нь бие даан эрх үүргээ хэрэгжүүлэх боломжтой байх,
- Үр ашигтай байх;
- Үр ашигтай байх нөхцлүүдээс сонгон шалгаруулах;
- Эзэмшиж ашигласан төлбөрөө улсын төсөвт эргүүлэн төлдөг байх.

Төрийн өмчийг захиран зарцуулах арга замууд нь зорилгоо хэрхэн биелүүлж байгаагаар тодорхойлогдох ба хоёр төрлийн хэлбэрээр илэрнэ.

Эрх зүйн арга зам – энэ нь өмчийн харилцааг зохицуулж буй хууль, эрх зүйн баримт бичиг болон төрийн байгууллагын шийдвэр, тогтоосон журам, тухайн өмчийн харилцаан дахь бусад ердийн процедураар илэрнэ. Эдгээр нь ОХУ-ын хуулинд хамаарна.

Эдийн засгийн арга зам - Төрийн өмчийн эд хөрөнгийг ашиглаж буй үйлдвэр аж ахуйн газруудын үйл ажиллагаа болон тухайн өмчийн харилцаанд оролцогч бусад этгээдийн эдийн засгийн ашиг сонирхлоор илэрнэ.

Эдийн засгийн удирдлага дахь төрийн өмчийн харилцаа нь ОХУ-ын Иргэний хууль болон бусад эрх зүйн актуудаар зохицуулагддаг. Мөн үүнд хамаарах үйлдвэр аж ахуйн газрыг Засгийн газар болон Ерөнхийлөгчийн шийдвэрийг үндэслэн төрийн өмчийн асуудал

хариуцсан салбарын яам үүсгэн бий болгодог.

Төрийн өмчийн эд хөрөнгийг бусад алив нэг арилжааны болон арилжааны бус үйл ажиллагааг эрхлэдэг этгээдтэй хамтрах, хорших хэлбэрээр ашиглах нь бүрэн нээлттэй. Үүнд барилга байшин, мөнгөн хөрөнгө, үнэт цаас гэх мэт мөнгөн дүнгээр илэрхийлэгдэж болох эдийн болон эдийн бус бүх төрлийн өмч хөрөнгийг нэрлэж болно. Ийнхүү төрийн өмчийг бусадтай хамтран ашиглах хэлбэрээр төсвийн ашиг орлогыг нэмэгдүүлэхээр шийдвэрлэсэн тохиолдолд Засгийн газар үүнийг ээлжит Төсвийн хуулийн төслийн хамт Төрийн Думын хуралдаанд оруулж ирэн шийдвэрлүүлнэ.

Энэ төрлийн хөрөнгө оруулалтын гэрээг ашгийн төлөөх арилжааны байгууллагатай хийх тохиолдолд Сангийн яамны сайд төрийг төлөөлөн гарын үсэг зурна. Харин арилжааны бус байгууллагатай хийсэн гэрээнд гэрээний зорилгын дагуух Салбарын яамны сайд гарын үсэг зурдаг.

Барилга барих, техник технологийн шинэчлэл хийх зэрэг их бүтээн байгуулалтын шинжтэй томоохон төслүүдэд төрөөс төсвийн хөрөнгөөр хөрөнгө оруулалт хийж хамтран ажиллах тохиолдолд уг төсөлд оролцох төрийн эрх мэдлийн хувь хэмжээ хөрөнгө оруулалтынхаа хувь хэмжээг даган пропорциональ байдлаар нэмэгддэг.

Хэрэв төр төсвийн хөрөнгө оруулалттай төслөөс татгалзах тохиолдолд Засгийн газар дангаар шийдвэрээ гаргах бөгөөд боломжтой гэж үзвэл хамтран ажиллаж байсан нөгөө этгээддээ өөрийн эзэмшлийн өмч хөрөнгөө хувьчлах арга замаар шилжүүлж болдог.

Төрийн өмчийг захиран зарцуулах эрх зүйн арга замуудад түрээс, лизинг, хариу төлбөргүй ашиглах гэх мэт Иргэний хууль болон бусад салбар чиглэлийн хууль зүйн актуудаар зохицуулагддаг олон төрлийн санхүүгийн арга хэлбэрүүд багтдаг. Үүнээс төрийн өмчийн эд хөрөнгийг түрээслэх талаар дэлгэрэнгүй авч үзье.

Төрийн өмчийн эд хөрөнгийг түрээслүүлэх тухай асуудлыг Сангийн яам шийдэх бөгөөд түрээслэх хүсэлт гаргагч нь тус улсын иргэн, ААН, байгууллага болон хууль ёсоор бүртгэгдсэн гадаад улсын хөрөнгө оруулалттай ААН, байгууллага, гадаад улсын иргэн, ААН, байгууллага хэн ч байж болно. Түрээслүүлэхдээ сонгон шалгаруулалт явуулах буюу сонгон шалгаруулалтгүйгээр шилжүүлэн өгч болно. Хэрэв төрийн өмчийн эд хөрөнгийг сонгон шалгаруулалтгүйгээр түрээслүүлэх тохиолдолд Засгийн газар болон Ерөнхийлөгчийн зөвшөөрлийг үндэслэн Сангийн яам шийдвэрлэнэ. Хүсэлт гаргагчдаас сонгон шалгаруулалт хийж төрийн өмчийг түрээслэх бол Сангийн яам сонгон шалгаруулалтын Хороо, шалгуур үзүүлэлт зэргийг бий болгож зохион байгуулна.

Төрийн өмчийн эд хөрөнгийг түрээслэж ашиглагч нь Сангийн яамнаас гаргасан аргачлал, заавар, хувь хэмжээний дагуу түрээсийн төлбөр төлнө. Түрээсийн төлбөрийн суурь хэмжээг жил бүр хянан үзэх бөгөөд хэрэв төлбөрийн хувь хэмжээг бууруулах, нэмэгдүүлэх шаардлагатай гэж үзвэл хууль тогтоох байгууллагад хандана.

Түрээсийн төлбөрийг тогтоосон хугацаанд улсын төсөвт оруулах ба зарим тохиолдолд түрээсийн гэрээ дууссаны дараа төлбөрөө хийж болохоор онцлог зохицуулалт буюу онцгой нөхцөл байж болдог.

Төрийн өмчийн эд хөрөнгийг түрээслэх тухай гэрээг Сангийн яамны оролцоогүй хийхийг хориглодог ба ийм тохиолдолд ОХУ-ын Иргэний хуулийн зааснаар уг гэрээ хүчингүйд тооцогдоно.

Түрээсийн гэрээнд дараах зүйлүүд тусгагдана.

- Түрээслэх эд хөрөнгийн бүрэлдэхүүн
- Түрээсийн төлбөр төлөх нөхцөл болон хугацаа. Хугацааны хувьд тодорхой үе шатаар болон гэрээний үүрэг дуусахад гэх мэт
- Түрээсийн төлбөрийн хэмжээ
- Нөхөн төлбөр болон харилцан тохиролцооны нөхцөл
- Түрээслэгч болон түрээслүүлэгчийн эрх үүрэг
- Түрээсийн эд хөрөнгийн олон нийтийн өмчлөлд хамаарах хэсгийн ашиглалт, төлбөр болон бусад нөхцөлүүд
- Түрээсийн гэрээний зөрчилд хүлээлгэх хариуцлага, түрээсийн төлбөр төлөх боломжгүй болох гэнэтийн болон давагдашгүй хүчин зүйл
- Гэрээ цуцлах нөхцөл

Хувийн сонирхол, хандлагаар түрээсийн төлбөрийн хөнгөлөлт үзүүлэхийг хатуу хориглодог. Төрийн өмчийн эд хөрөнгийг түрээслэгч нь тухайн өмч хөрөнгөнд заавал даатгалын гэрээ хийх ёстой бөгөөд уг хөрөнгийн үнэлгээнд нийцүүлэн тооцсон хэмжээгээр батлан даалтын төлбөр урьдчилан төлнө. Энэхүү баталгаа мөнгөн хөрөнгийг Сангийн яам тусгай дансанд байршуулж хадгалах ба түрээсийн гэрээ дууссаны дараа түрээслэгчид буцаан олгоно. Хэрэв түрээслэгч гэрээгээр эзэмшиж ашиглаж буй хөрөнгийг өөр бусад этгээдэд давхар буюу дамжуулан түрээслэх бол заавал Сангийн яамнаас зөвшөөрөл авна.

Төрийн өмчит үйлдвэр, ААН дээрх журмаар түрээсийн гэрээ байгуулж өмчийн эрхээ бусдад шилжүүлж болно. Энэхүү өмчийн эрхийн хүрээнд тус хуулийн этгээдийн эзэмшиж байсан хөдлөх болон үл хөдлөх бүх өмчийн эрх багтаж болно. Тухайлбал, газрын эрх, ашигт малтмал олборлох, усны нөөц ашиглах гэх мэт. Хэрэв ийнхүү төрийн өмчийн эд хөрөнгийг цогцоор нь түрээслэх бол гэрээний хугацаа 10 жилээс хэтрэхгүй байна. Гэрээний хугацаа дууссаны дараа Сангийн яам гэрээний зүйлийг худалдах зэргээр гэрээний гүйцэтгэлийг дуусгаж болох бөгөөд хэрэв цаашид гэрээг үргэлжлүүлэх шаардлагатай гэж үзвэл хугацааг сунгаж болно. Харин түрээслэгч гэрээг цаашид үргэлжлүүлэхээс татгалзах тохиолдолд Сангийн яам түрээсийн гэрээ байгуулах тухай нийтэд хандсан зар гаргана. Энэ тохиолдолд түрээсийн гэрээ байгуулах тухай хүсэлт гаргагч нь уг хүсэлтээ заавал бичгээр хийж Сангийн яаманд ирүүлэх ба Сангийн яам уг этгээдтэй дахин гэрээ байгуулна.

Төрийн өмчийн эд хөрөнгийг түрээслэгч нь түрээсийн гэрээ дууссаны дараа төрийн өмчийн эд хөрөнгийг хүлээлгэн өгөх акт үйлдэж Сангийн яаманд хүргүүлнэ. Үүний дагуу талууд бүртгэл, шалгалтын ажиллагаа явуулж өмч хөрөнгийг хүлээлцэнэ. Төрийн өмчийн эд хөрөнгийг хүлээлцэх акт нь түрээсийн гэрээний салшгүй хэсэг байна.

Төрийн өмчийн эд хөрөнгийн менежментийн эдийн засгийн арга зам гэсэн ойлголтод консалтинг, маркетинг, төлөвлөлт, хяналт шинжилгээ-мониторинг, аудит, бүртгэл тооцоо, даатгал гэсэн маш олон зүйлс багтана. Консалтинг нь Засгийн газар буюу түүнээс эрх олгогдсон байгууллага эдийн засгийн харилцаан дахь төрийн өмчийг үр ашигтайгаар захиран зарцуулахад чиглэгддэг. Консалтингийн бүтээгдэхүүн нь дараахь зүйлсийг хэрхэн шийдвэрлэх талаар гол анхаарлаа хандуулдаг.

- Төрийн өмчийн эд хөрөнгийг үр ашигтай захиран зарцуулах хөтөлбөр
- Төрийн өмчийн эд хөрөнгийг үр ашигтай захиран зарцуулахад шаардагдах эрх зүйн орчин
- Төрийн өмчийн эд хөрөнгийг үр ашигтай захиран зарцуулж буй эсэх талаарх мониторингийн систем
- Төрийн өмчийн эд хөрөнгийг хувьчлах, буцаан төрийн өмчид авах талаарх бизнес төлөвлөгөө

Консалтингийг тусгай мэргэшсэн өндөр ур чадвар бүхий баг гүйцэтгэх ба энэхүү мэргэшсэн зөвлөгчдийг сонгон шалгаруулалтын журмаар Засгийн газраас сонгоно. Сонгон шалгаруулалтын хороог Сангийн яам болон Төрийн өмчийн сангийн төлөөллүүдээс бүрдүүлнэ. Хорооны дарга нь Сангийн сайд байна. Шалгарсан консалтингийн багтай хамтран ажиллахад нэг жилийн гэрээ хийх ба шаардлагатай тохиолдолд зөвхөн хоёр удаа хугацааг нь сунгадаг.

* * *

**ОХУ -ын төрийн өмчийн эд хөрөнгийг захиран зарцуулах талаарх хууль
тогтоомжууд:**

1. Гражданский кодекс Российской Федерации.
2. Федеральный закон «Об акционерных обществах»
3. Федеральный закон «О приватизации государственного имущества и об основах приватизации муниципального имущества в Российской Федерации»



UIH.MN
СУДАЛГААНЫ САН

